

Seorang Inspektor, 5 anggota IPD Jerantut ditahan SPRM

Oleh ABDUL RASHID ABDUL RAHMAN | 6 Mei 2023, 12:03 pm



Antara anggota polis yang ditahan bagi membantu siasatan melibatkan kes rasuah di Mahkamah Temerloh hari ini.

TEMERLOH – Suruhanjaya Pencegahan Rasuah Malaysia (SPRM) menahan lima anggota polis dan seorang pegawai berpangkat inspektor kerana disyaki menerima rasuah bernilai RM5,000.

Suspek yang berumur antara 29 hingga 46 tahun itu ditahan ketika memberikan keterangan di pejabat SPRM Temerloh di sini petang semalam.

Difahamkan dalam kejadian Rabu lalu enam suspek daripada Jabatan Siasatan Jenayah Narkotik Ibu Pejabat polis Daerah (IPD) Jerantut itu dikatakan meminta wang sebanyak RM5,000 bagi menyelesaikan kes serbuan melibatkan air ketum di sebuah rumah di Jerantut.

Pendaftar Mahkamah Temerloh Mohamed Shah Reza Noor Azman memerintahkan tahanan reman selama enam hari ke atas kesemua suspek.

Pengarah SPRM Pahang, Hairuzam Mohmad Amin@Hamim mengesahkan penahanan dan kes disiasat di bawah Seksyen 16 (a) (A) Akta SPRM 2009. – KOSMO! ONLINE